

敘州府志卷四十二

紀事一自漢置犍爲郡始

體詳方志雜廁思譏條縷既折鉅要或遺略稽往事  
珠貫鱗差匪云編年先後以時瑣聞叢說亦附於茲  
述紀事第二十八

漢建元六年大行王恢擊東越東越殺王郢以報恢因  
兵威使番陽令唐蒙風指曉南越南越食蒙枸醬蒙  
問所從來曰道西北牂柯江廣數里出番禺城下蒙  
歸至長安問蜀賈人賈人曰獨蜀枸醬多持竊出市  
夜郎夜郎者臨牂柯江江廣百餘步足以行船南越

敘州府志

卷四十二

紀事

一

以財物役屬夜郎西至桐師然亦不能臣使也蒙乃  
上書說上曰南越王黃屋左纛地東西萬餘里名爲  
外臣實一州主也今以長沙豫章往水道多絕難行  
竊聞夜郎所有精兵可得十餘萬浮船牂柯江出其  
不意此制越一奇也誠以漢之疆巴郡之饒通夜郎  
道爲置吏甚易上許之乃拜蒙爲中郎將將千人食  
重萬餘人從巴蜀笮關入遂見夜郎侯多同蒙厚賜  
喻以威德約爲置吏使其子爲令夜郎旁小邑皆貪  
漢繒帛以爲漢道險終不能有也乃且聽蒙約還報  
乃以爲犍爲郡發巴蜀卒治道自僊道指牂柯江蜀

人司馬相如亦言西夷邛笮可置郡使相如以中郎將往諭皆如南夷爲置一都尉十餘縣屬蜀當是時巴蜀四郡通西南夷道戍轉相饟數歲道不通士罷餓離濕死者甚眾西南夷又數反發兵興擊耗費無功上患之使公孫宏往視問焉還對言其不便及宏爲御史大夫是時方築朔方以據河逐胡宏因數言西南夷害可且罷專力事匈奴上罷西夷獨置南夷夜郎兩縣一都尉稍令犍爲自葆就

史記西南夷傳

司馬相如爲郎數歲會唐蒙使略通夜郎西犍中發巴蜀吏卒千人郡又多爲發轉漕萬餘人用興法誅

敘州府志

卷四十二

紀事

二

其渠帥巴蜀民大驚恐上聞之乃使相如責唐蒙等因喻告巴蜀民以非上意相如還報唐蒙已略通夜郎因通西南夷道發巴蜀廣漢卒作者數萬人治道二歲道不成士卒多物故費以巨萬計蜀民及漢用事者多言其不便是時邛笮之君長聞南夷與漢通得賞賜多多欲願爲內臣妾請吏比南夷天子問相如相如曰邛笮冉駹者近蜀道亦易通秦時常爲郡縣至漢興而罷今誠復通爲置郡縣愈於南夷天子以爲然乃拜相如爲中郎將往使副使王然于壺充國呂越人馳四乘之傳因巴蜀吏幣物以賂四夷長

卿便略定西夷邛笮冉駹斯榆之君皆請爲內臣除邊關關益斥西至沫若水南至牂柯爲徼通靈關道橋孫水以通邛都還報天子天子大說

史記司馬相如傳漢書

大

元朔三年罷西南夷

漢書武帝紀

騫曰臣在大夏時見邛竹杖蜀布問安得此大夏國  
人曰吾賈人往市之身毒國身毒國在大夏東南可  
數千里其俗土著與大夏同而卑濕暑熱其民乘象  
以戰其國臨大水焉以騫度之大夏去漢萬二千里  
居西南今身毒又居大夏西從羌中險羌人惡之少

敘州府志

卷四十二

紀事

三

北則爲匈奴所得從蜀宜徑又無寇天子旣聞大夏  
之屬皆大國多奇物土著頗與中國同俗而兵弱貴  
漢財物誠得而以義屬之則地廣萬里威德徧四海  
欣欣以騫言爲然乃令因蜀犍爲發間使四道並出  
出駝出笮出徙邛出僂皆各行一二千里其北方閉  
氏笮南方閉昆明昆明之屬無君長善寇盜輒殺略  
漢使終莫得通然聞其西可千餘里有乘象國名滇  
越而蜀賈間出物者或至焉於是漢以求大夏道始  
通滇國初漢欲通西南東費多罷之及騫言可以通

大夏迺復事西南夷

漢書張騫傳

武帝元狩元年南粵反上使馳義侯因犍爲發南夷兵且蘭君恐遠行旁國虜其老弱乃與其眾反殺使者及犍爲太守漢廼發巴蜀罪人當擊南粵者八校尉擊之會越已破漢八校尉不下中郎將郭昌衛廣引兵還行誅隔滇道者且蘭斬首數萬遂平南夷爲

牂柯郡

漢書

孝昭始元元年益州廉頭姑繒民反殺長吏牂柯談指同竝等二十四邑凡三萬餘人皆反遣水衡都尉發蜀郡犍爲犇命萬餘人擊牂柯大破之後三歲姑繒葉榆復反遣水衡都尉呂辟胡將郡兵擊之辟胡

敘州府志

卷四十二

紀事

四

不進蠻夷遂殺益州太守乘勝與辟胡戰士戰及溺死者四千餘人明年復遣軍正王平與大鴻臚田廣明等竝進大破益州斬首捕虜五萬餘級獲畜產十餘萬上曰鉤町侯亡波率其邑君長人民擊反者斬首捕虜有功其立亡波爲鉤町王至成帝和平中夜郎王興與鉤釘王禹漏臥侯俞更舉兵相攻牂柯太守請發兵誅興等議者以爲道遠不可擊廼遣大中大夫蜀郡張匡持節和解興等不從命刻木象漢吏立道旁射之杜欽說大將軍王鳳曰大中大夫匡使和解蠻夷王侯王侯受詔已復相攻輕易漢使不憚

國威其效可見恐議者選奕復守和解太守察動靜有變廼以聞如此則復曠一時王侯得收獵其眾申固其謀黨助眾多各不勝忿必相殄滅自知罪成狂犯守尉遠藏温暑毒草之地雖有孫吳將賁育士若入水火往必焦沒知勇亡所施屯田守之費不可勝量宜因其罪惡未成未疑漢家加誅陰敕旁郡守尉練士馬大司農豫調穀積要害處選任職太守往以秋涼時入誅其王侯尤不軌者卽以爲不毛之地亡用之民聖王不以勞中國宜罷郡放棄其民絕其王侯勿復通如以先帝所立累世之功不可墮壞亦宜

因其萌芽早斷絕之及已成形然後戰師則萬姓被害大將軍鳳於是薦金城司馬陳立爲牂柯太守立者臨邛人前爲連然長不韋令蠻夷畏之及至牂柯諭告夜郎王興與不從命立請誅之未報廼從吏數十人出行縣至興國且同亭長召興興將數千人往至亭從邑君數十人入見立立數責因斷頭邑君曰將軍誅亡狀爲民除害願出曉士眾以興頭示之皆釋兵降鉤町王禹漏臥侯俞震恐入粟千斛牛羊勞吏士立還歸郡興妻父翁指興子牙務收餘兵迫脅旁二十二邑反至冬立奏募諸夷與都尉長史分

將攻翁指等據院爲壘立使奇兵絕其饗道縱反間以誘其眾都尉萬年曰兵久不決費不可共引兵獨進敗走趨立營立怒叱戲下令格之都尉復還戰立引兵救之時天大旱立攻絕其水道蠻夷共斬翁指持首出降立已平定西夷徵詣京師會巴郡有盜賊復以立爲巴郡太守秩中二千石居賜爵左庶長徙爲天水太守勸民農桑爲天下最賜金四十斤入爲左曹衛將軍護軍都尉卒官王莽篡位改漢制貶鉤町王以爲侯王邯怨恨牂柯大尹周欽詐殺邯邯弟承攻殺欽州郡擊之不能服三邊蠻夷愁擾盡反復

殺益州大尹程隆莽遣平蠻將軍馮茂發巴蜀犍爲吏士賦斂取足於民以擊益州出入三年疾疫死者什七巴蜀騷動莽徵茂還誅之更遣甯始將軍廉丹與庸部牧史熊大發天水隴西騎士廣漢巴蜀犍爲吏民十萬人轉輸者合二十萬人擊之始至頗斬首數千其後軍糧前後不相及士卒饑疫三歲餘死者數萬而粵嶠蠻夷任貴亦殺太守枚根自立爲邛穀王會莽敗漢興誅貴復舊號云

漢書

趙雲自江州分定江陽犍爲

華陽國志  
公孫志

建安十九年劉先主定蜀遣安遠將軍南郡鄧方以

朱提太守庾降都督治南昌縣同南  
中志

先主薨後牂柯郡丞朱提朱褒領太守恣睢丞相諸  
葛亮以初遭大喪未便加兵遣越嵩太守巴西龔祿  
往安上縣遙領郡從事蜀郡常頌行部南入至牂柯  
收郡主簿考訊姦褒因殺頌爲亂同南  
中志

三年春三月丞相亮南征四郡四郡皆平改益州郡  
爲建甯郡分建甯永昌爲雲南郡分建甯牂柯爲興  
古郡十二月亮還成都同上  
蜀志

亮南征自安上由水路入越嵩而別遣馬忠伐牂柯  
李恢向益州高定元自旄牛定笮多爲壘守亮欲俟

敘州府志

卷四十二

紀事

七

定元軍衆集合併討之軍卑水定元部曲殺雍闓孟  
獲代闓爲主亮旣斬定元而馬忠破牂柯夏五月亮  
渡瀘征益州生虜孟獲赦使還合軍更戰足七虜七  
赦獲等心服曰明公天威也邊民長不爲惡矣秋遂  
平四郡改益州爲建甯又分建甯牂柯爲興古郡以

馬忠爲牂柯太守同南  
中志

高定恣睢于越嵩雍闓跋扈於建甯朱褒反叛於牂  
柯丞相亮南征先由越嵩而李恢案道向建甯諸縣  
大相糾合圍恢軍於昆明時恢衆少敵倍又未得亮  
聲息始謂南人曰官軍糧盡欲規退還吾中間久斥

鄉里乃今得還不能復北欲還與汝等同計謀故以誠相告南人信之故圍守怠緩於是恢出擊大破之追奔逐北南至槃江東接牂柯與亮聲勢相援南土平定恢軍功居多

三國志蜀志

附吳省欽南征故道考榮經南孟橋傳是孟獲就擒處清溪東南有武侯城武侯戰場甯遠廢瀘州蠻名沙城險亦云武侯擒獲處而明副使富好禮謂大渡河卽古瀘水武侯五月渡此此皆非也漢文帝廢淮南王徙之嚴道邛郵邛崃之有郵舊矣武帝使司馬相如開越嵩韓說開益州唐蒙開牂

敘州府志

卷四十二

紀事

八

柯華陽國志建興三年春亮南征自安上由水路入越嵩五月渡瀘水征益州續漢書郡國志越嵩無安上縣而常氏言縣去郡八百里在潛溪馬湖二縣之間其地當在今黃螂馬邊及涼山夷界當元狩元年張騫因蜀犍爲發間使通滇國建武十九年益州夷叛遣將軍劉尙發廣漢犍爲蜀郡人及朱提夷討之尙渡瀘水入益州大破棟蠶等羌而唐蒙先於僂道開閣鑿石其道廣四五尺武侯順流而下由僂道而至安上入越嵩非自安上而入水也今成都至建昌

卽甯遠府

度清溪之大相公嶺

邛崃九折 絕大渡河非半月不達而明洪武七年

景川侯曹震來蜀開道以峩眉自建昌古有驛道

平易可行較舊路近二三百里遂爲闢治嘉靖中

富好禮令甯遠指揮丁敖自相公嶺緣獼狍之境

而東達峩眉爲戍堡五曰小菩薩曰黑麻溝曰一

碗水曰板房曰金石爲公館四曰舒快曰老木坪

曰獼狍曰射箭坪連絡三百餘里箭坪則編峩眉

民五十人獼狍則土民五十人每堡及舒快木坪

各從越嵩軍守之隆慶中越嵩指揮程昱議開鎮

西戶所在越嵩廳北至獼狍舊路直抵峩眉所謂

敘州府志

卷四十二

紀事

九

新驛者是也孟獲之叛在益州距越嵩尙遠而會  
理州西百五十里有瀘水自建昌南流入入金沙  
江四五月間瘴氣尤甚又水急多巉石土人以牛  
皮船爲涉杜佑謂武侯所渡在此然則武侯之至  
越嵩循唐蒙故道而其入益州則循劉尙故道也  
范成大言瀘州近城有渡瀘亭或以敘州正對馬  
湖江馬湖夷武侯當自彼而渡然成大不知渡瀘  
尙在漢越嵩郡治以外世之人又不知涼山夷境  
之昔爲漢縣其取道也便而誤以武侯由今雅州  
而南卽峩眉東路之廢亦廢於明季搶攘之秋修

而復之不難也故並著之

白華文集

晉太康三年罷甯州置南夷以天水李毅爲校尉持節  
統兵鎮南中統五十八部夷族都監行事毅後永昌  
呂祥爲校尉祥後數人李廣漢從雲南犍爲郡守爲  
校尉久之建甯太守巴西杜俊朱提太守梓潼雍約  
懦鈍無治政以賂成俊奪大姓鐵官令毛詵中郎李  
叡部曲致誅弟耐罪朱提大姓太中大夫李猛有才  
幹弟爲功曹分當察舉而俊約受都尉雷逢賂舉逢  
子炤孝廉不禮猛等怨之太安元年秋詵叡逐俊  
以叛猛胎之書曰昔魯侯失道李氏出之天之愛民

敘州府志

卷四十二

紀事

十

君師所治知足下追踵古人見賢思齊足下箕帚枉  
慚吾郡亦逐約應之作亂眾數萬毅討破斬誅首叡  
走依遑耶五苓夷帥于陵承猛箋降曰生長遐荒不  
達禮教徒與李雄和光合勢雖不能營師五丈略地  
渭濱冀北斷褒斜東據永安退考靈符晉德長久誠  
非狂夫所能干輒表革面歸罪有司毅惡其言遂誘  
殺之部永昌從事孫辨上南中形勢七郡斗絕晉弱  
夷強加其土人屈塞應復甯州以相鎮慰冬十一月  
丙戌詔書復置甯州增統牂柯益州朱提合七郡爲  
刺史加龍驤將軍進封成都縣侯二年于陵承及誅

猛遑耶扇動謀反破壞郡縣會毅疾甚軍連不利但力固孤城時李特李雄作亂益州所在有事救援莫至毅上疏陳謝光熙元年春三月毅薨子釗任洛還赴到牂柯路塞三年乃得達父喪文武復逼釗領州府事朝廷贈少府諡曰威侯以廣漢太守魏興王遜爲南夷校尉甯州刺史代毅自永嘉元年受除四年乃至表釗爲朱提太守治南廣禦雄時荒亂後官民虛弱繩紀弛廢遜惡衣菜食招集夷民勞來不怠數年克復以五苓夷昔爲亂首討滅之及討惡獠剛夷數千落威震南方而嚴猛太過多所誅鋤犍爲太守

敘州府志

卷四十二

紀事

十一

10X

朱提雷炤流民陰貢平樂太守董霸破牂柯平夷南廣北降李雄建甯爨量與益州太守李暹梁水太守董謹保興古盤南以叛雄遣叔父驤破越嵩代甯州遜使督護雲南姚岳拒驤於堂螂縣違遜指授雖大破之驤不獲太興四年遜發病薨州人推中子堅領州事永昌元年晉朝更用零陵太守南陽尹奉爲甯州刺史南夷校尉加安西將軍奉威刑緩鈍政治不理咸和八年遂爲雄弟壽所破獲南中盡爲雄所有

節華陽國志南中志

梁武帝時先鐵奉使討獠立戎州卽以鐵爲本州刺史

唐自南詔叛天子數遣使至其境酋龍不肯拜使者遂絕西川節度使高駢以其俗尙浮屠法遣浮屠景仙攝使往酋龍與其下迎謁且拜乃定盟而還遣清平官酋望趙宗政質子三十入朝乞盟請爲兄弟若舅甥詔拜景仙鴻臚卿檢校左散騎常侍駢結吐蕃尙延心嗚未魯耨笏等爲間築戎州馬湖沐源川大渡河三城列屯拒險料壯卒爲平夷軍南詔氣奪酋龍恚發疽死

唐書

宋眞宗祥符元年瀘州江安縣夷人殺傷內屬戶害巡

敘州府志

卷四十二

紀事

十二



檢任賽瀘夷巴蜀西南徼外夷自黔恭以西至涪瀘嘉敘綿亘數千里剛夷惡獠殆千萬計自宋治平之末訖於靖康皆通互市奉職貢亦時有剽掠至是遂爲亂詔遣閣門祇候侍其旭乘傳招撫旭至蠻人首罪殺牲爲誓未幾復叛旭因追斬數十級擒其首領三人又以衣服紬布誘降降蠻斗婆行者按誅其罪上以旭召而殺之違招撫之實卽降詔戒止且令篤恩信設方略制禦無尙討伐以滋驚擾二年旭言夷人恃巖險未卽歸服詔文思副使孫正辭等爲都巡檢使乃分三路入其境脅以兵威皆震懼伏罪三年

正辭言夷人安集降詔嘉獎先有蠻羅忽餘甚忠順防援并監捕殺違命者不已止遣內臣郝昭信褒慰之且諭以赦蠻黨前罪勿復邀擊四年戎州夷族首領耆老刑牛犬於三溪誓不侵擾州界又峽路鈴轄執爲亂夷人王羣體等至關下上白蠻夷不識教義今之爲亂亦守臣失於綏撫竝免死分隸江浙遠地其年霸州董喆爲其巡檢使董廷早所殺五年黎洞夷人互相殺害巡檢使發兵掩捕上聞而切責之曰蠻夷相攻許邊吏和斷安可擅發兵甲或致擾動卽令有司更選可任者代之五年晏州多剛縣夷人斗

望行牌率教刼涪井監殺駐泊借職平言大掠資畜知瀘州江安縣秦職文信領兵趨之遇害民皆驚擾走保戎州轉運使寇瑊卽令諸州巡檢會江安縣集公私五百餘艘載糧甲張旗幟擊銅鑼鼓吹自蜀江下抵清浮壩樹營柵抱安近界夷族諭以大兵將至勿與望等同惡未幾納溪監順州刺史个私生南八姓諸團島蠻獠王子界南廣溪移悅等十一州刺史李紹安山後高鞏六州及江安界娑娑村首領竝來乞盟立竹爲誓各刺猫狗鷄血和酒飲之誓同力討賊瑊乃署榜許以官軍至不殺其老幼給賜衣幣酒

食上遣內殿崇班王懷信乘傳與瑛議綏撫方略瑛言斗望等屢爲寇鈔恃寬赦不悛惡今請發嘉眉屯兵捕剪以震懼之六年九月詔懷信爲嘉眉戎瀘等州水陸都巡檢使閣門祇候康訓符承訓爲都同巡檢使及發虎翼神虎等兵三千餘人令懷信與瑛商度進討上因謂樞密使陳堯叟曰往時孫正辭討蠻有虎翼小校率眾冒險者三人朕志其姓名今以配懷信正辭嘗料簡鄉丁號白芳子兵以其識山川險要遂爲鄉導今亦令懷信召募又使臣宋賁屢規畫溪峒事適中機要以賁知江安縣與懷信等議事瑛

乃點集昌盧富順監白芳子弟得六千餘人十一月懷信康訓分領緣溪入合灘至生南界斗滿村遇夷賊二千餘人擊之殺傷五百人奪梭槍藤牌會暮收眾保砦夷黨三千餘人分兩道張旗喊呼來逼砦柵懷信出擊皆潰散進壁娑婆遇夷二千於羅募村又破之追至斗行村上屏風山連破四砦一日三戰俘馘百餘人奪資糧五千石鎗刀什器萬數焚羅固募斗引等三千餘村庵舍三千區懷信又引兵至至斗行村追擊過盧羅射仆二百餘人爇其欄柵千數分遣部下於羅箇頰羅能落運等村及龍峩山掩殺大

獲戎具斬首級及重傷投崖死者頗眾燒舍千區及積穀累萬兩路兵會於涇灘置砦遣康訓部壕砦卒修涇灘路以渡大軍俄爲夷賊所邀戰不利訓顛於崖死之懷信引兵急擊大敗之追斬至涇灘懷信夾砦於晏江口城與符承訓偵知賊謀欲乘夜擊晏江馳報懷信卽自涇灘拔砦赴之比至晏江北山夷眾萬餘已自東南合勢逼懷信砦懷信彀强弩環砦射賊城等整眾乘高策援夷人大懼而卻合擊破之死傷千餘人七年正月其酋斗望三路分眾來鬪又爲官軍大敗射殺數百人溺江水死者莫計夷人震讙

詣軍首服納牛羊銅鼓器械城等依詔撫諭二月還軍涪井夷首斗望及諸村首領悉赴監自陳願貸死永不寇盜邊境因殺三牲盟誓辭甚懇苦卽犒以牢酒感悅而去城懷信等上言夷人甯息請置涪井監壕柵井許近界市馬從之

宋史

仁宗慶曆四年四月涪水夷人攻三江砦夷在瀘州亦西南邊地所部十州曰鞏曰定曰高曰奉曰涪曰宋曰納曰晏曰投附曰長甯皆夷人居之依山險善寇掠涪井監在夷地中朝廷置吏領之以拊夷眾或不得人往往生事至是詔秦鳳路總管司發兵千人

選官馳往捕擊既而瀘州教練使生南招闕

安將史愛誘降夷賊斗敖等詔

竝補三班差使殿侍涓井監一路招安巡檢未幾夷眾復寇三江砦指使王用等擊走之皇祐元年二月夷眾萬餘人復圍涓井監水陸不通者甚久初監戶晏州夷人錢而毆傷斗落妹其眾憤怒欲報之知瀘州張昭信勸諭既已聽服而涓井監復執婆然村夷人細令等殺長甯州落占等十人故激成其亂詔知益州田况發旁郡士卒命梓夔路兵馬鈐轄宋定往援之於是兩路合官軍泊白芳子弟幾二萬人與戰

兵死者甚眾饑死又千餘人數月然後平賜况及轉運使敕書褒獎宋定而下十三人進秩有差後况還朝乃奏夷眾連年爲亂由主者非其人請令轉運鈐轄司舉官爲知監監押代還日特遷一資從之嘉祐二年三里村夷斗還等百五十人復謀內寇有黃土坎夷斗蓋長甯州人也先以其事來告涓井監引兵趨之捕斬七千餘級鈐轄司上聞詔賜斗蓋錢三十萬錦袍銀帶明年又補斗蓋長甯州刺史瀘州部舊領那州廢已久有烏蠻王子得蓋者來居其地部族最盛數遣人詣官自言願得州名以長夷落事聞因

賜號姚州鑄印予之得蓋又乞敕書一道以遺子孫  
詔從其請夔州路又有溱南二州夷頗盛彊皇祐初  
詔自今歲遣使者存問之宋史

神宗熙甯元年命徙賴因砦監押駐榮丁砦敘州三  
路蠻西北曰董蠻正西曰石門部東南曰南廣蠻董  
蠻在馬湖江古僰侯國也唐羈縻馴騁浪商四州之  
地其酋董氏宋初有董春借者貢馬自稱馬湖路三  
千七部落都王子其地北近犍爲之沐川賴因砦砦  
阨蠻險蠻數寇抄熙甯紹聖中朝廷皆爲徙賴因監  
押駐榮丁砦而以縣吏控截政和中始改差監押充

敘州府志

卷四十二

紀事

十七

知砦事蠻寇掠如故南廣蠻在敘州慶符縣以西爲  
州十有四大觀三年有夷酋羅永順楊光榮李世恭  
等各有地內屬詔建滋純祥三州後皆廢石門番部  
與臨洮土羌接唐興播等十二州之地俗椎髻披氍  
佩刀居必欄棚不喜耕稼多畜敘其人精悍善戰鬪  
自馬湖南廣諸族皆畏之蓋古浪稽魯望諸部也宋史  
神宗熙甯七年瀘州涪水夷羈縻十州五岡蠻也雜  
種夷獠散居溪谷中慶歷初瀘州言管下溪峒十州  
有唐及本朝所賜州額今烏蠻王子得蓋居其地部  
族最盛旁有舊姚州廢已久得蓋願得州名以長夷

落詔復建姚州以得蓋爲刺史鑄印賜之得蓋死其子竊號羅氏鬼主鬼主死子僕射襲其號浸弱不能令諸族烏蠻有二酋領曰晏子曰斧望箇恕常入漢地鬻馬晏子所居直長甯甯遠以南斧望箇恕所居直納溪江安以東皆僕夜諸部也晏子距漢地絕近猶有涪井之阻斧望箇恕近納溪以舟下瀘不過半日二酋浸强大擅劫晏州山外六姓及納溪二十四姓生夷夷弱小皆相與供其寶熙甯七年六姓夷自涪井謀入寇命熊本經制之景思忠戰歿本將蜀兵募土丁及夷界黔州弩手以毒矢射賊賊驚潰於是

山前後長甯等十郡八姓及武都夷皆內附請入貢受王命提點刑獄范百祿因作文以誓之竝立石於武甯砦熊本言二酋桀黠不羈縻之則諸蠻未易服遂遣人說誘招納於是晏子斧望箇恕及僕夜皆願入貢受王命晏子未及命而死乃以箇恕知歸來州僕夜知姚州以箇恕之子乞弟晏子之子沙取祿路竝爲把截將西南夷部巡檢八年俞州獠寇南州獠酋阿訛率其黨奔箇恕熊本重賞檄斬訛訛桀黠習知邊境虛實箇恕匿不殺詭降於納溪訛得不死甚德箇恕爲伺邊隙會箇恕老厭兵以事屬乞弟遂與

訛侵諸郡十年羅苟夷犯納溪砦初砦民與羅苟夷  
競魚笥誤毆殺之吏爲按驗夷已忿謂漢殺吾人官  
不償我骨價反暴露之遂叛提點刑獄穆珣言納溪  
去瀘一舍羅苟去納溪數里今託事起端若不加誅  
則烏蠻觀望爲害不細乃詔涇原副總管韓存寶擊  
之存寶詔乞弟等犄角討蕩五十六村十三囤蠻乞  
降願納土承賦租乃詔罷兵元豐元年乞弟率晏州  
夷合步騎六千至江安城下責平羅苟之賞城中守  
兵纔數百震恐不能授甲蠻數日乃引去知瀘州喬  
敘要欲與盟遣梓夔都監王宣以兵二千守江安仍

奏以乞弟襲歸來州刺史韓運遣小校楊舜之召乞  
弟拜敕乞弟不出道就賜之亦不見而令小蠻從舜  
之取敕以去喬敘因沙取祿路以賄招乞弟乃肯來  
三年盟於納溪蠻以爲畏已益悖慢盟五日遂以眾  
圍羅箇牟族羅箇牟熊本所團結熟夷也王宣往救  
之蠻解圍合力拒官軍宣與一軍皆沒事遂張駟召  
存寶授方略統三將兵萬八千趨東川存寶怯懦不  
敢進乞弟送款給降存寶信之遂休兵於綿梓遂資  
閒四年詔以環慶副總管林廣代存寶按寶逗撓誅  
之熟夷楊光震殺阿詔林廣與光震竝力討賊乞弟

恐復送欵帝以其前後反覆無真降意督廣進師廣遂破樂共城至斗蒲村斬首二千五百級次落婆乞弟乃納降廣盛陳兵以受之對語良久乞弟疑有變引眾遁廣帥兵深入會大雨雪浹旬始次老人山山形劔立度黑崖至鴉飛不到山五年正月次歸來州天大寒然柱爲薪軍士皆凍墮指畱四日求乞弟不可得內侍麥文昞問廣軍事廣曰賊未授首當待罪文昞乃出所受密詔曰大兵深入討賊期在梟獲元惡如已破其巢穴雖未得乞弟亦聽班師軍中皆呼萬歲曰天子居九重明見萬里外乃以眾還自納溪

之役師行凡四十日築城樂共城江門砦梅嶺席帽溪堡西達涪井東道納溪皆控制要害捷書聞赦梓州路以歸來州地賜羅氏鬼主乞弟旣失土窮甚往來諸蠻間無所依帝猶欲招來之命知瀘州王光祖開諭許以自新會其死於是羅始党斗然斗更等諸酋請依十九姓團結新收生界八姓兩江夷族請依七姓團結皆爲義軍從之自是瀘夷震懼不復爲邊患夷長沙取祿路死子鰲弊承襲

宋史

徽宗政和五年知梅嶺砦高公老之妻帝之宗室女也常出釜玉器飲晏州夷酋卜漏等心豔之會瀘帥

賈宗諒以斂竹木擾夷部夷人咸怨漏遂相結因上元張燈襲破梅嶺砦擄公老妻及其器物四出剽掠轉運使趙遙聞之倍道趨瀘州討賊詔發陝西軍三萬人以遙領之捕山獠束麻灌蠟爇之獠奔燒賊舍大軍繼進斬卜漏賊平拓地二千里遙爲建城砦畫疆畝募人耕種且習戰守號曰勝兵高公老妻不辱死詔贈節義族姪加遙龍圖閣直學士經略安撫使授鰥弊西南夷界都大巡檢統之

宋史

宋孝宗時何師心知敘州南蠻叛修戰守之具置巖棚以保居民吳曦叛知敘州薛九齡鳩材治兵以討平

敘州府志

卷四十二

紀事

二十一

之

通志

元憲宗八年結桑從攻釣魚山苦竹崖大林平青居山

破重慶馬湖天水

元史薛塔喇海傳

呼圖克家古嚕克台氏父孛罕太宗時授萬戶從都元帥達海甘布出征卒軍中憲宗命呼圖克將其軍從都元帥達勒達攻巴州又從帥元帥耨埒渡馬湖

江破宋敘州兵於老君山下

元史本傳呼圖克舊作忽都

特默齊圖魯卜台人從諸王穆爾齊征蜀後以兵從塔海甘布和爾齊耨埒諸大帥歲戊午耨埒攻涪州還至馬湖江宋兵連艦絕江不得進特默齊率精兵

三千擊之奪其舟以濟又於橫江嘉定宣化三縣造浮橋以達成都耨埒以爲能命將千人從萬戶錫勒塔克略地碉門黎雅錫勒塔克死行院塔齊以特默齊爲萬戶領其軍中統四年授蒙古漢軍萬戶至元九年從行齊伊蘇岱爾征建都又從院汪特格呼敦等攻嘉定重慶敘瀘諸州

元史本傳特默齊舊作探馬赤

丹珠爾蒙古達勒達岱人至元七年從征蜀敗宋兵於馬湖江斬首百餘級十一年從攻下敘瀘諸州

元史

本傳

至元二十二年九月烏蒙叛命四川行院伊蘇岱爾

敘州府志

卷四十二

紀事

二十二

將兵討之馬湖路總管舒策以蠻軍三百爲助降西

崖門酋長阿者等百餘戶

元史世祖本紀

明太祖洪武四年平蜀永甯內附永甯唐蘭州地宋爲

瀘州江安合江二縣境元置永甯路領筠連州及騰

川縣後改爲永甯宣撫司自內附後置永甯衛六年

筠連州滕大寨蠻編張等叛詐稱雲南兵據湖南長

甯諸州縣命成都衛指揮袁洪討之洪引兵至敘州

慶符縣攻破清平關擒僞千戶李文質等編張遁走

復以兵犯江安諸縣洪追及之又敗其眾焚其九寨

獲編張子僞鎮撫張壽編張遁匿溪洞餘黨散入雲

南帝聞之刺諭洪曰南蠻叛服不常不足罪旣獲其俘宜編爲軍且駐境上必以兵震之使讐天威無遺後患未幾張復聚眾據滕大寨洪移兵討敗之追至小芒部張遁去遂取得花寨擒阿普等自是張不敢復出其寨悉平遂降筠連州爲縣屬敘州以九姓長官司隸永甯安撫司七年陞永甯等處軍民安撫司爲宣撫使司秩正三品八年以祿照爲宣撫使十七年永甯宣撫使祿照貢馬詔賜鈔幣冠服定三年一貢如例十八年祿照遣弟阿居來朝言比年賦馬皆已輸惟糧不能如數緣大軍南征蠻民驚竄耕種失

時加以兵後疾疫死亡者多故輸納不及命蠲之二十三年永甯宣撫言所轄地水道有一百九十灘其江門大灘有十二處皆石塞其流詔景川侯曹震往疏鑿之二十四年震至瀘州按視有枝河通永甯乃鑿石削崖以通漕運二十六年以祿照子阿聶襲職先是祿照坐事逮至京得直還卒於途其子阿聶與弟智皆在大學遂以庶母奢尾署司事至是奢尾入朝請以阿聶襲從之

明史

洪武二十七年戎縣夷出沒不常奉旨調敘南衛移於珙縣之下羅計以備守禦永樂間遣總兵官梁福

率師征討夷竄深箐不能窮追乃招安之十三年遣都督李敬率師擒其渠魁而撫其餘黨宣德二年夷復寇筠連都指揮徐諒撫安之未幾又劫高珙長甯慶江等縣監察御史楊燦詣戎縣招撫大壩等砦捕獲夷首械送京師九年夷賊又叛調都指揮李榮督戎縣官兵擒斬二十九名正統四年又燒劫各縣都指揮王杲集戎縣溪夷鄉老招出五邨夷諭以禍福令回各砦擒賊三十四名其餘埋石爲誓景泰元年正月高珙筠戎夷人並起聲言漢人每年公差下砦徵糧害我我當出報遂縛公差於樹殺之各攻本縣

屠長甯劫慶符江安納谿燒廬舍恣殺掠諸縣爲之一赤有司飛奏遣僉都御史李匡監察御史劉澣經制其事適時盛暑地多疫厲士卒死者甚眾匡澣俱嬰疾澣卒匡尋愈遣都指揮周貴等破箐前昔乖等砦俘斬數百賊舍米粟負財物入深箐大軍圍之剪木皮以食餓死幾半乃乞降天順元年芒部諸夷妖言惑眾號天師圍筠連凡九日敘南指揮丁信李英等力戰殲之五年以戎縣夷人連年流劫遣總兵官許貴討之

珙縣志

成化元年山都掌大壩等寨蠻賊分劫江安等縣兵

部以聞詔遣僉都御史汪浩都督芮成征之侍讀周洪謨上疏請於都掌照九姓司設長官使寨主自擇素所信服者命爲土官部議以其事付汪浩芮成時浩在成都捕反賊趙鐸成在敘州知戎縣漢民不欲夷人割置土官而利其鈐轄乃不月本縣勘報惟召其鄰縣夷酋導參議王禮等詣都掌諸砦諭以設官之意諸夷大悅其酋長率二百人詣敘州見成自具馬二十七匹爲赴闕謝恩計成犒之而賞以布令還戎縣以俟尋遣人報浩會奏謂都掌箐前大壩三處宜設三長官司疏八方議鑄印九月汪浩至自成都

戎縣漢民不欲置土官者以甘言啖浩謂成所招諸酋雖授以官終不能禁其劫掠此皆梟雄一可當百乘機除之則餘孽皆庸劣不足慮也浩不知其詐遂決意殺之至戎縣諸酋迎謁浩諭之曰降蠻太少與官太多可回寨招三千蠻民來卽與奏異日諸酋入卽閉營門壯士皆露刃環列浩厲聲責之諸蠻自納歎之後久釋金革至是惟叩首請罪露刃者皆前殺二百七十餘人浩使人報成成曰是成所招者已與公會奏矣奈何殺之猶豫數日乃又與浩合奏夷始雖歸降終則異志且欲伏兵敵殺官軍不得已調大

軍勦之斬首若干破寨若干旣而諸寨餘黨聚議報  
讐十月乃赴貴州總兵官處詐降都指揮丁實等出  
迎夷之伏兵四起官軍五千餘眾皆沒十一月初欲  
寇四川浩等聞之夜奔長甯分軍實各縣徑還成都  
時官軍夜行迷道人馬墮溪谷死者不可勝紀眾賊  
追浩等聲言欲鬻其肉不及乃攻長甯三日適聞戎  
縣人劫其巢穴乃解圍去時夷恨旣深鋒不可當貴  
州兵屯金雞池四川兵屯戎縣兩軍堅壁不出而夷  
人由其間循江之南直抵江納合江如履無人之境  
諸縣官民皆遷江北露次浩往來江上不敢南泊江

安賈家寨爲賊所屠殺五百五十餘口縣官走白浩  
浩怒曰吾方報捷豈又有賊耶捶之幾死乃遣人鉗  
各縣欲訴夷情者一夕夷驅合江等縣婦女一百七  
十人水牛三百次長甯石笋下山都指揮宰用等率  
軍逐之賊皆遁盡獲所擄人畜時三司以成浩旣奏  
賊宜勦不宜撫故勞餉以供兩軍二年旣不能勦不  
敢撫會長甯縣具陳夷人向攻城時有必欲復讐之  
言以聞朝命如可撫則撫之於是遣人招撫夷人遂  
聽命使夷首十二人赴京貢馬十二銅鼓一具告乞  
仍設土官但畏浩等勢不敢言枉殺父兄事浩等欲

實前奏終不與設官夷人益恨復抄掠上聞乃遣總兵官襄城伯李瑾兵部尙書程信等率兵討之國子學錄黃明善奏四川山都掌蠻屢歲出沒殺掠良民景泰元招之復叛天順六年撫之又反近總兵李安令永甯宣撫奢貴赴大壩招撫亦未效恐開釁無已宜及大兵之集早爲定計毋釀邊患三年明善復言宋時多剛縣蠻爲寇用白芳子兵破之白芳子者卽今之民壯多剛縣者卽今之都掌多剛寨也前代用鄉兵有明效宜急募民壯以助官軍都掌水稻十月熟宜督兵先時取其田禾則三月之內蠻必餒矣軍

宜分三路南從金鵝池攻大壩中從戎縣攻箐前北從高縣攻都掌小寨破大寨自拔又大壩南百餘里爲芒部西南二百里爲烏蒙令二府土官截其險要更用火器自下而上順風延爇寨必可攻且征調土兵須處置得宜招募民壯須賞罰必信詔總兵官參用之時總督尙書程信亦奏都掌地勢險要必得土兵嚮道請敕東川芒部烏蒙烏撒諸府兵竝速調湖廣永順保靖兵以備征遣又請南京戰馬一千應用皆報可三年十二月大軍至芮成由戎縣進都御史陳宜參將吳經由芒部進指揮韓忠由普冰腦進貴

州總兵吳榮爲左哨由李子關進汪浩督參將宰用  
爲右哨由渡船舖進大軍勦賊燒二百餘寨敘南指  
揮同知李鑛破凌霄城功爲最諸賊旣平程信等奏  
改大壩爲太平置長官司舉永甯土人黃錡爲長官  
於渡船舖置瀘州衛尋舉殺賊有功僉事嚴正爲副  
使韓忠爲都督僉事充參將守川貴地方六年之間  
賴以甯謐四年信奏永甯宣撫奢貴開通運道擒獲  
賊首宜降璽書獎賚從之

明史

成化十六年白獯獯羿子與都掌大壩蠻相攻禮部  
侍郎周洪謨言臣敘人也知敘蠻情戒珙筠高諸縣

敘州府志

卷四十二

紀事

二十八

在前代皆土官國朝始代以流言語性情不相習用  
激變洪永宣正四朝四命將徂征隨服隨叛景泰初  
益滋蔓至今爲梗臣向嘗言仍立土官治之爲久遠  
計而都御史汪浩徼幸邊功誣殺所保土官及寨主  
二百餘人諸蠻怨入骨髓轉肆劫掠及尙書程信統  
大兵僅能克之臣以謂及今順蠻人之情擇其眾所  
推服者許爲大寨主俾世襲庶可相安又白獯獯者  
相傳爲廣西流蠻有眾數千無統屬景泰中糾戎珙  
苗攻破長甯九縣今又侵擾都掌其所居崖險箐深  
旣難剪滅亦宜立長官司治之地近芒部宜卽隸之

羿子者永甯宣撫所轄而永甯乃雲貴要衝南跨赤水畢節六七百里以一柔婦人制數萬強梁之眾故每事刼掠臣以爲宣撫土獠仍令宣撫奢貴治之其南境寨蠻近赤水畢節要路者宜立二長官司仍隸永甯宣撫夫土官有職無俸無損國儲有益邊備從之

明史

正德九年葛魁夷人普法惡與夷女米浪通生子假稱浪爲王母子爲彌勒佛惡爲天官潛刻符印造旗劍集熨羿苗猓等夷燒香各給印符一張使佩之謂兵不能傷又謂劍出人頭各落旗動軍馬自潰作諸

敘州府志

卷四十二

紀事

二十九

幻妄謀爲不軌夷人愚惑傾心事之十年十二月夷部與筠連縣流民蘇衝等爭田有隙屢訐不直惡乘眾忿誘之復讐屠數百人於是諸夷寨俱叛衆幾萬人攻城堡刼財殺人焚廬舍僭號事聞命巡撫都憲馬昊總兵吳坤調集漢土官兵萬餘人征之七月昊令土巡檢安宇招撫白水江四十八寨來降十月令都司張麟杜琮西從筠路進昊自督都司曹昱知縣步梁等東從珙路進又命通判趙文振監烏蒙東川軍南從本路進刻期夾攻取黨宋老虎母豬寨底及田保白牛落木祥落木柔等寨乘勢星馳至敘破落

崖川山洞猫兒崖洞雞爪山下火龍響黃溝等寨又併攻峯崖寨酋法惡敗走涪州鄉勇皮邦興斬其首自胸至足毛長寸餘餘黨推阿告爲主拒守十二年正月取磨底等寨五月趙文振破大井壩擒首惡羿子阿設者過賊黨悉平各軍通計俘斬三千餘其墜崖溺水者不可勝數二月師回五月阿告等來降鄉兵邀功殺之會量田官復增額糧奪降者之田以授他人眾心憤恨流民謝文義乘機煽惑二千餘人九月圍筠連縣守禦官望風奔潰署印訓導李韶竭力戰守賊乃還焚掠千餘家殺擄五百餘人御史盧雍

敘州府志

卷四十二

紀事

三十

令知府陸芸遣人招撫賊黨來降十一月賊復攻筠連兵備田荆統兵適至討平之

明史

萬曆元年四川巡撫曾省吾奏都蠻叛逆發兵征討都蠻名山都掌蠻有凌霄九絲都都諸寨凌霄者阿苟之所據也苟之先在天順成化間謀不軌兵部尙書程信襄城伯李瑾計平之其後有阿共常爲盜未敗嘉靖間以從征賜冠帶卽苟父也苟有壻阿辱

大事

紀作阿孰

與其黨阿奎么兒阿繆皆桀驁多膂力至是重以爲可恃遂衣蟒衣張蓋策駟馬所至用鼓吹響呼夾道而馳萬曆二年都御史曾省吾御史孫代聞於

朝下兵部議先是兵部尙書譚綸曾撫川奏都蠻爲患其來已久今遺孽復熾當先練關隘游兵以備不測乃募浙人製烏鎗鎗發口啞而死者數人蠻甚憚之至是綸請征敕省吾及總兵劉顯進勦至大壩獲其酋長阿果梟斬之苟益不平乃流殺長甯諸處椎埋坑儒生剝剔孕婦有羅氏女冬兒被執不辱支解而挂之樹間都御史責劉顯觀望且慮諸蠻多效尤相繼起乃調永甯宣撫奢效忠與水西土舍安國亨各以萬人至省吾奏都蠻叛逆發兵征討土官奢效忠首在調但與貴州土官安國亨有讐請竝令總兵

官劉顯節制使不得藉口復讐妄有騷動從之效忠與國亨遂同指揮守備據險從三路入而副使李江參議沈伯龍轉漕軍中會武舉人李之實與阿苟善同知洪一貫使爲間誘執之乃乘勢轉戰連獲阿辱阿奎等斬首二百級檻阿苟獻軍前苟仰首笑曰么兒在雖執我何益哉么兒苟義兒多力者也顯乃設伏馬草坡襲落豹惡戾坎寨然後向凌霄攀藤援木而上諸蠻皆走獨么兒以滾木壘石當我軍我軍稍卻步兵鄭龍奮而前曰諸軍第望我火箭火箭舉則齊發而入於是各貫弓挾矢目逆龍龍忽燃火箭直

衝蠻鋒諸軍萬弩齊進蠻盡墮下旣前執么兒并胡大漢等九十五人斬首二百餘級焚死無算阿苟聞么兒被擒哭曰九絲不復守矣其後餘黨據他寨者盡爲劉顯等所滅於是都都寨九絲之戰都都寨寨主名阿墨與九絲蠻同據險稱亂方諸軍擊凌霄時卽欲勦九絲而都御史獨決策謂先攻都都可斷九絲左臂也是時鎮雄土舍隴清親帥三千軍軍藍澗坡用火攻都都而總兵郭成吳鯨等亦舉火燒董布壩及紅崖逼寨寨中鼓譟出四走會雷雨火熄蠻復聚大兵乃迎諸蠻戰諸蠻皆殊死不可敗翌日顯

與成各分兵二路攀崖仰攻而印壩諸苗千餘來援顯回擊卻之乃督鎮雄西陽諸土兵更番入斬蠻王四首則阿墨在焉乃大搜諸寨生獲阿歐阿當阿瓦阿掛等虜茶穀鼓梭槍無算而九絲乃大恐九絲之蠻以萬數阿大阿二方三其著者也當是時阿大阻雞冠嶺而阿二方三嬰九絲城壁壘相望乃以凌霄都都相繼滅震懼思詐降以覘虛實會長甯諸生王希忠珙縣監生何鈺有機智請以賊用閒乃令二人持銀牌綺幣往撫而阿大大喜遽隨二人出徒跣叩軍門請得備編戶不敢反都御史初疑之必得阿二

方三來始受降既而予冠帶趨受約束使捕阿二等  
自贖阿大乃遁去顧其勢與九絲隔陰爲聲援將伺  
我師走奧中則翼而復之諸將訶實戒勿進然同時  
諸蠻若雞冠黃土內官母豬弔猴崖得居印靶諸寨  
則實以阿大降故皆先後歸順九絲由此勢孤先是  
副使李江司轉運遙從萬山中逆舟而上中有巔木  
二灘亂石縱橫水勢直下若建瓴長年循高崖牽引  
多死至派僧夫數十人猶不足營山青神二主簿相  
繼道斃成都知府陳大壯鳩工鑿二灘但梅雨暴漲  
督工巡檢曾本死於水相顧嘆惜至是諸蠻降諸軍

多因糧於賊省轉運乃遣劉顯爲大將佐以郭成劉  
縱冉維屏奢效忠等將入都都寨而先從深溝楊柳  
坡印靶窆口穀爆以扼其險期日請決戰不勝乃薄  
責效忠隴清等謂前以一萬騎三日破凌霄五日破  
都都寨今合兵五萬騎而連月不克一九絲何哉效  
忠發憤提羿兵夜半陰襲隘詰旦爲重陽日我師方  
就蠻飽食將登高望而蠻俗以是日賽神天大霧晝  
晦度我師不能至皆盡醉鼾睡謀者得其狀會暴雨  
夜半傳發冒兩入攀絙而上未明斬守關者蠻大驚  
自殘殺蹈藉我師益衝擊之遂大潰追獲阿大於雞

冠寨斬阿二方三於夜朗太盤之間先後下寨柵六十有奇斬首捕虜得四千六百餘人酋長十人獲銅鼓爲諸葛鼓九十三面他若牛羊諸物不可勝計時阿大見銅鼓跪而泣爲大將軍言曰是鼓有神凡鼓體剝蝕而聲硃硃者上鼓也可易牛千頭體澤而聲鋒鋒者次鼓也可易牛八百頭蠻人得上鼓二三面便可雄視一方當吾興師時擊鼓高山諸蠻聞山頭鼓聲纂纂來椎牛而饗之而後出行劫劫勝則復椎牛祭鼓以爲神今可得乎九絲平先後下蠻寨六十有奇燔營舍六千所斬首俘獲四千六百有奇擒酋

長三十六名招安三千三百口拓地四百里獲銅鼓九十三面題改戎爲興文縣卽內官寨列雉爲城名曰建武廳設總兵兵備僉事坐鎮之隸以安邊同知一守備司一坐營司一守禦千戶所一儒學一其他阨塞悉設堡戍守官兵則自瀘州衛中前二所徙置焉自諸夷爲患於長筠高珙慶江等縣亦云烈矣至是改戎縣爲興文賜驛名曰都甯倉名曰恒裕并易九絲曰恒蠻凌霄曰拱極都都曰都定印靶曰文印鈎猴曰降蠻雞冠曰金雞且又通內官寨道置總兵僉事以鎮臨之隸以府同知一人守禦千戶所一人

明曾省吾議處都蠻疏略議照都蠻東連永甯南接芒部西通烏蒙北達馬湖而戎長高珙慶筠六縣近相連絡卽古戎僰漢西南夷也唐宋置州內附不過羈縻至本朝悉改爲官流官鈐治屬之戎縣辦納稅糧以爲編民故土夷環列一有不靖尤勤問罪矧茲編民在中獨可任其跳梁是以洪武永樂宣德正統以來屢用燒劫爲害或撫或勦不一然未大創惟景泰元年夷賊並起攻破長甯慶符江安納谿諸縣爲之一赤僉都御史李匡監察

敘州府志

卷四十二

紀事

三十五

御史劉澣入山征勦比以癘疫大興賊逃山箐旋復班師天順元年五年兩次攻圍各縣先後遣總兵都督等官問罪延至成化元年賊勢益張遣兵部尙書程信襄城伯李瑾御史郎中主事等官率領大兵十八萬駐歷四年士卒損傷雖眾然亦頗貽數十年之安嘉靖時生齒日繁逋逃助惡每每騷動縣官隨勦隨叛愈撫愈張綁擄千百戶殺死巡僉搶掠縣令衙署久益無忌至今搶掠又復不止六縣而敘瀘江納均罹荼毒兼之士司平時則交通罔利調征則黨助縱逃包藏禍心漸成尾大

失今不治不惟長效尤之惡而地方三面瀕夷時有兵革一隅玩愒他患可虞此羣蠻之罪在今日法所必誅而以勦爲撫事後設官此議處之大略也

曾省吾平蠻善後疏照得山都巢穴今已蕩平所有善後事宜條爲十事庶懲前慮後禦防可以無慮酌古準今經制因之漸備往昔負固之區今當屹然成一巨鎮不惟鄰夷近土便於控扼而雲貴接壤亦得相犄角以永治安矣 一復兵道查得下川南地方原設守巡兵三道隆慶三年內裁減

分巡併歸守道今照守道駐敘州巡道駐瀘州皆係內地相去蠻方動踰五日之程且錢糧獄訟煩多勢難遠周荒徼而九絲初平經綸草昧之始招攜懷遠均田治兵其勢必得憲臣專力彈壓方克內修戎備外震諸夷且總鎮兵權雖重而府州縣一應軍需臨時非有該道會同明文必難調發故今日爲地方久安之策莫先遵守成法查復兵備與總鎮會同行事使文武相資上下相繫庶事有統紀邊方之憲度一新而職有專司善後之安攘有賴矣 一設府佐照得諸蠻旣平夷方盡爲中

土但去府城數百里據土司四面之中勢頗孤懸  
又山川險阻夷漢錯雜必得文官分理於下方保  
無虞但遽議郡縣則荒惡之區所居未能成聚附  
之隣近縣分則聲勢隔絕未免仍復生奸僉議謂  
設同知兼理兵民始爲得策及查敘州府先年原  
有通判一員駐筊嘉明鎮督糧後行裁革今見奉  
明詔查復成法合無於該府添設安邊同知一員  
照依各省海防事例欽頒關防專駐新築城內管  
理兵餉收放稅糧清理詞訟安撫民夷上承兵道  
委用下定武職賢否庶邊鎮政刑俱有統紀而錢

糧出納亦有貴成矣 一建城垣照得安內攘外  
固以設險爲要圖而况啟土建邦尤以築城爲首  
務今照山都地方周圍數百餘里扼險設要尤必  
得道里適中形勢之區方足以壯居重馭輕之勢  
據司道等官奉臣明文看得各寨舊名多惡宜更  
換以新耳目權將九絲城爲平蠻城凌霄城爲拱  
極城印靶山爲文印山弔猴山爲降蠻山鷄冠嶺  
爲金雞嶺內官寨爲武甯山都都寨爲都定寨隨  
踏得武甯一處地土寬厚風氣湊集坐西面東前  
對文印山後坐金雞嶺左扼平蠻右倚都定應於

本處建城以爲雄鎮就前面大河爲濠城制周圍計九百丈開東南西北門內設總兵兵備道衙門同知府館守禦千戶所坐營公署倉場庫獄城隍廟旗纛神廟各一所修葺營房一千二百間另立演武廳於馬草坡其合用木石磚瓦等料及造作工價聽守巡道委官估計呈詳修理一移守禦照得城垣旣建應有守禦官軍世守本土而外用招兵協守則主客相濟斯保無虞今照敘南衛三所軍數僅一千有零又經題撥馬湖府一所難以別議查得附近瀘州衛先與瀘州同郭止設左右

中三所成化年間因大垵蠻叛將該衛改調太平九姓二長官司適中之地奏將重慶衛改調太平官軍割附瀘州衛湊併四所每所額設旗軍一千一百二十名今蠻旣蕩平卽當全衛改入九絲但該衛去新建武所城不滿百里分兵兩地同禦一方聲勢足以相援控扼尤爲便益合無將該衛中前二所官軍割併守禦千戶一所及將敘南衛原中隘官軍有屯田附近九絲者行兵備道查明附改新所差操充實營伍請乞改定所名另頒印信直隸都司仍於敘南瀘州二衛指揮內軍政考選

一員掌管所印 一理疆土照得平蠻武甯地方  
廣袤疆界當清而田土膏腴經制宜定東南與永  
甯九姓太平二長官司東北與戎長高琪筠連諸  
縣西北與鎮雄府威靜二司相連四面界限已經  
守巡道同總鎮委官清查明白樹立石碑以杜侵  
爭其見在田地一面委官清丈分別上中下三等  
造冊收查一面行集附近軍民有情願受廛爲民  
者各委官就籍名在冊分定某處住居量其人力  
眾寡撥給田畝卽爲世業仍分別某人上中下田  
糧本折各半一應驛傳鹽鈔丁差雜派俱行豁免



其高山深谷不便耕種者分撥附近居民樵牧俱  
免起徵內有茶利者仍丈量畝數官佃民軍採摘  
每畝徵銀一錢收貯所庫專聽兵道總鎮賞犒軍  
兵花布之費前項田地税糧俱待一年之後徵輸  
聽安邊同知催徵收放置立循還文簿送兵備道  
稽查又照所城新復遐荒百無一備戍守官員相  
應酌其職之崇卑將附近田地量行撥給以敷薪  
菜馬料之資其總兵衙門田地各一百五十畝同  
知衙門田地各八十畝新設千戶所掌印指揮一  
員田三十畝千戶每員田二十畝百戶每員田十

畝不拘田地永不起科其總兵衙門廩給每日五錢於瀘州商稅銀內動支持新定地方賦有定額卽於本處徵解田地候裁革之時止給一半與遊擊衙門耕種餘一半入官另行招人領種辦納糧差一扼要害照得平蠻地方漢夷雜居犬牙交錯險道運雲深林集霧易於狐兔跬伏之所卽今巢穴雖空未免逃匿兼之土夷往來彼此構釁必須多方設備以戒不虞除調到土兵已經撒散應留軍兵酌量備用外所據有名險寨及緊要隘關俱應設立堡墩互相守望今議得窆口魚井坑蠻

寨文印山得杭都定寨得勝營墨帽尖山毛垵拱極城頂冠山各設堡一所每處用兵五百名又於平蠻城山頂設墩四所腳板崖竹柏嶺金雞嶺阿兒寨平寨高寨降蠻山得九麥易營黃連洞和尚寺洞礦溪落照谷爆筆架山口蠻啞飯甌陳四落甕各設墩一所每處用兵五十名深溝子銅鑛芭蕉歇馬青岡每處用兵一百名以上官兵卽於總兵劉顯並原任總兵郭成參將張澤標兵及上年設隘原兵並今年所募新兵內挑選共足一萬七千六百名分割前項堡墩旣備行總兵劉顯督同

大小將領統攝防守一應機宜悉聽總鎮調度候  
萬曆二年三月中將前兵汰減七千六百名年終  
汰減五千名止存五千名候調撥軍兵赴所分撥  
墩堡防禦及待二年後田糧起徵編取民兵再行  
遞減並各墩堡應留應革亦俟以漸議裁庶軍食  
既足而錢糧以次可省矣 一起民兵照得蠻方  
險遠應有戍兵防守見今分布各堡隘者俱係雇  
募官兵漸當裁減今照本處沃田數多應以本地  
之利供本處之兵庶可以省公帑之費免轉輸之  
勞所據見在標兵即使授田屯守似亦寓兵於農

之意但各兵係四方選集無冊籍可稽而遽使坐  
受糧餉之人轉驅南畝風氣不調勞苦不耐勢必  
逃移他日田地荒蕪不無後慮若作軍田照屯例  
起科則子粒太重人不樂從募民實塞與額兵屯  
田事體自難一律眾論參詳俱屬不便今議招集  
附近土著軍民領種田地三年之後照畝起科誠  
爲便利然止徵稅糧不起鄉兵則所取甚微養兵  
太少亦非長計合議以糧起兵就令於附近隘所  
防守自衛身家卽保甲相連守望相助之意非所  
以爲厲也合無待戶籍既定居民湊集之日每糧

一石起丁壯一名卽令於相近隘堡處所聽委官調度操練防禦安邊同知親加督理嚴禁堡官私役科求等弊兵道亦不時稽查以寬恤新民充實邊土一通道路照得蠻夷未平則阻隘塞關以遏截爲上蠻夷旣平則伐木通道以開治爲先平蠻地方在萬山之中往來曲徑俱由箐林絕壁豺虎縱橫往時蠻眾每由間道出劫而漢民不敢經行必由羅星落亥迂路濡遲今旣蕩平巢穴則山溪便道隨處可通西則由歇馬漢村達黑帽尖山以入得勝營東則由長甯達蠻埡口以至毛垵營

北則由得窆口達魚井以至文印山及諸小道可以往來俱行總兵劉顯委撥官兵翦伐林木開治平坦其外則南廣水路一道直達新城中間有巒木二灘亦當開濬徑通舟楫以達該所仍備造大河船十隻伺兵備道總鎮衙門巡歷之用陸路至敘州府經由慶符高縣至珙縣計程速則三日緩則四五日若至南廣間道從月口漢陽壩薄刀嶺羅洗場龍灣鎮日半可以徑透珙縣但中途無止宿之處夫馬無接遞之便遂阻不行今應於羅洗場適中地方設一公館就將興長高珙慶筠宜賓

七縣原僉夫馬內每縣抽取馬十匹夫十五名共一百零五名委官一員管束在彼答應公差只換夫馬不支廩糧再於薄刀領漢陽壩二處令慶符縣添設鋪分二所自珙縣起至新所沿途十里設鋪與薄刀漢陽二鋪俱徭編司兵二名遞送公文應給工食照各縣所轄地方編派屬新所地界者暫行珙縣動支官銀雇募候二年之後於該所應徵稅糧內動銀雇役以上造船水手應修公館鋪舍錢糧等項俱聽守巡二道委官估報修理一設社學照得修文來遠莫先教化今蠻荒所闢旣

建鎮城本宜立學但桀悍餘風遽難盡革且人民招集未多經制應當有漸合於新所之中設立社學一處大書教民榜文掄選近縣年高有德明於講說者二名送赴學中爲教讀塾師令新集之民朔望赴學聽講其後生子弟送學訓教詩書漸變夷風安邊同知親行提調應給教讀燈油米柴於茶稅銀內動支持後人民湊集另議建學育材而文命覃敷矣一恤民困照得高筠興珙慶長六縣人民二百年來被都蠻荼毒最苦最深丁壯非被擄掠卽散之四方老弱非遭殺戮卽轉於溝

壑雖有子遺之民挨縣居住亦朝不保暮而六縣之官徒擁空名有選出不赴任卽乞休者此以前時勢孤危不可盡狀今仰一人神武銳意除殘流離之民漸次復業隨據守巡下川南道議得復業艱難將軍前支剩米豆量動四萬石權爲分別賑濟但前米係各倉久貯賑穀所碾幸而因糧於賊得此餘剩堆放之糧日久未免霉爛前項極困之民若非破格蠲免何以慰更生之望扶起瘡痍及照全省順逆水次州縣轉運兵餉辦理雜需軍機所係急於星火亦屬偏累所當併恤伏覩隆慶六

年六月初十日奉詔書內一欵軍國錢糧隆慶二年三年四年各量免十分之三等因欽遵外及查六縣賦役不多合無將萬曆元年以前小民拖欠各項錢糧悉從特免其餘濱江州縣各將前項應免年分錢糧除已免已完外其未完之數俯准減豁以寬小民供辦之力以溥朝廷浩蕩之恩則所謂旣出諸水火而又加之衽席之上民亦安集歡欣內地實而外患永消矣

萬曆十五年邛部夷撒假合雷波夷目楊九乍黃螂夷首安興叛初嘉靖間越嵩邛部長官司判普書約

伯自稱鱷普王潛住賦乃地方與馬湖府賴因等處  
接壤守土長官失於隄防以致窺伺繼而勾連漁利  
帥眾殺掠至隆慶萬厯年間普書之子撒假踵惡不  
悛僭稱西國平天王黃螂夷首安興已革土知府安  
鼈後也負險恃眾久蓄異志截撈皇木殺傷人夫雷  
波夷目揚九乍據涼山素懷不軌兼得撒假結爲姻  
婭號爲三雄橫行邊境抄掠榮丁賴因煙溪等處殺  
死軍民三千餘人楊去男婦數萬餘口土民宋連赴  
撫院具訴奉批馬湖府著長官悅寶輝戍守而夷猥  
出沒無常邊境騷擾不甯自建昌兇夷王大咱等糾

眾煽亂都御史徐某調兵征勦議者謂賦乃諸夷爲  
大咱之後戶宜謹守以防奔突徵兵三千以都司李  
獻忠守備劉繼祖指揮尹崇壽領之三將懸軍深入  
營於涼山撒假素與雷波黃螂二夷通至是興與九  
乍陽爲嚮順誘賺官兵深入導假降獻忠輕與之盟  
遂撤營前驅二十里軍出山口賊忽大譟截掠輜重  
後隊悉棄甲走三將死焉聲聞撫院具疏於朝命總  
兵李應祥將兵討之推副使李用監軍右副使彭某  
紀功贊畫則敘州府唐守欽同知陳守聽紀律則成  
都府同知余紹運餉則本府同知彭芹烏蒙府通判

楊成參將郭成朱文達都司萬鼇宣慰司楊應龍烏  
蒙土官祿榮各部兵咸聽節制徵調漢土官兵共四  
萬並敘南衛三所軍兵分爲二路參將郭成率敘南  
精銳兵由大河壩去馬邊三百里進參將朱文達都司萬鼇  
率高縣弩手建昌鎗手由西甯堡進卜以冬月出師  
祭旗誓師監軍李用語將曰曩者涼山失事皆由將  
領疏防茲欲勦巢雪恥必須探省虛實相度機宜俾  
犄角相維首尾相應切勿輕信深入致蹈故轍又指  
示方略曰膩乃黃螂結爲死黨若並討之彼必並力  
抗師且糧舟輸輓必由黃螂屋江水名去黃螂五十里以上若

敘州府志

卷四十二

紀事

四十六

附黃螂以便輸輓而分膩乃之勢俟膩乃平師歸挾  
兇首而繫之無難此明昭暗勦法也時分運餽餉悞  
事斬以徇播州兵搶人亦按法斬以徇雷波通事譯卽

者能通夷漢兩語

懷異志峻撥叛夷九乍亦斬之軍令肅然

十二月甲子總兵李應祥自敘戎卽敘州府厲練師旅進

馬湖發兵攻窆黑親擒其酋脚右脚阿係二番賊癸酉克

白窆天星圍大戰三日乃克先是參將郭成傳監軍

李用令遣土舍文安民諭安興待以不誅安民機洩

興潛約雷波出西球突衝我師西球係出天星幸偵逆

謀有備無虞萬曆十六年正月己丑撒假糾眾由大

木瓜兩路突襲官兵營播州兵大呼總兵李應祥截取其械杖始退王寅參將朱文達都司萬鼇兵破小木瓜二月辛酉大戰破大木瓜乙丑參將郭成分兵三道直搗膩乃膩乃奮力攻殺血戰數日男女突逸悉擒之丙子合兵攻魚塘口斬白魁魁係殺李獻忠之賊也

先李獻忠為賊所逼逃入夷巢白魁截殺之

戊寅參將郭成遇賊

於葫蘆山大破之

葫蘆山孟獲故巢也

三月己丑諸將合兵攻

涼溝麇於百合谷

或云百合谷即孟優廬居處

斬白曾阿什咱

假撒

弟之辛丑破小涼山啞泉崗

啞泉崗去小涼山十五里至今穴存焉人食之皆失

聲小涼山去涼山一百二十里

庚戌破老鼠崗孔明打卦石擒撒假

敘州府志

卷四十二

紀事

四十七

妻及男女四月甲寅參將朱文達兵渡瀘口

即瀘水也破

鷹嘴巖辛酉參將郭成兵破七洞關

一名大水關

甲子破

聚獸坡藤甲巖壬申破革窆洞撒假勢窮蹙裹乾糧

合心腹四十八人雌伏三寶山

山產黃連貝母附子故名

石壁中

求救於各洞蠻酋仍令二小夷伺官兵咸擒之內外

隔絕官兵駕雲梯眺之見賊矢盡乃探巖排碕連梯

逼之夷四十人多射死遂斬撒假醢之而渠魁授首

矣己卯發兵攻突窆黑遇風雨大作山嵐暴起士卒

稍怠參將郭成奮勇先登師遇西姑擺大戰擒之壬

子移師攻黃螂破祛裏密俘安興母楊氏興遁去五

月乙酉破那古埧俘安興妻沙氏辛丑都司萬鼇攻石坡羅坡圍破之俘安興與貌雄傑力敵萬夫先是假被誅興自度不免密議同安勉安興之弟據袪裏密以抗兵因戲以刀劈竹反傷左足不能行至是就擒戊寅下令班師雷波楊九乍潛藏四山巖門等處未獲初其妻馬氏曾阻九乍及大兵至自度難免率眾投降照舊管轄雷波萬曆十七年奉撫院再檄速擒九乍俾無餘孽監軍道李用會行參將郭成差人切責馬氏密將九乍出獻免致全家誅戮時馬氏有女一姿甚美母所最愛隨父潛匿被獲至敘州府收禁知

敘州府志

卷四十二

紀事

四十八

府唐議欲得九乍因結馬氏心遂以女還之馬氏益感勵密語耆把烏雉叫卜等刻染血牌前去河全窩

雷波深處不計里  
去石角隘八日

誘九乍出親帶部夷於五月初四

日行至小木瓜伏兵四起九乍隨抽刀拒敵參將郭成部下把總李必得封朝用鎗傷九乍左肋生擒之至西甯傷重自死以屍獻所稱三雄俱相繼殄滅生擒百餘斬首千餘敵血埋弩誓不復反南夷平定參將郭成之績居多部下李必得封朝用血戰爲最撫院具疏文武將吏功次以聞

舊通志

按膩乃諸夷種緣孟獲裔衍夜郎僭號稱王兇殘蒼

赤自謂怙惡憑險莫可誰何及大兵一至若摧枯拉朽相繼殄滅上舒天朝西顧之憂下洗邊民荼毒之憤開拓疆宇恢廣輿圖誠曠古所僅見者也萬曆十七年敕曰賦乃諸夷帖服蕩平除諸將士照功陞賞其苗民餘黨未靖若善後無策又安望長治久安與爾撫臣其同諸文武量地度宜審處時勢定爲經久之模以陳尋十二月撫院徐巡按何查議善後事宜酌九隘險易之勢定大小相制之宜條陳十二事從之遂於馬湖府設安邊同知一人守備一人皆給印綬同知食正四品服俸守備以都指揮體統行事頒

授敕書申明節制其要害築城二堡列兵千五百名戍之布恩信務修和寬則因俗急則相機責在同知察營壘偵向背寬則練息急則張皇責在守備乃就新鎮鄉築城九百雉賜名馬邊中城爲同知署旁爲分司公館以備守備往來駐紮進五十里爲兩河堡設把總一員渡江上煙草峯兩崖岸峻千仞濤湧萬壑鳥飛難渡造鐵纜三條凌空成橋名鐵鎖橋列兵一百名守之又進十里許築城四百雉中城建同知署後爲守備署再後爲敕書樓列兵二百名戍之又南爲施家寨屯兵一營共二百名戍之又迤北爲水

池築一堡屯兵一營共二百名戍之中營實守黃螂屯兵一營共二百名戍之檜溪屯兵五十名戍之鄉勇協防邊隘相望築亭障八庚寅始告成事更移兵備道於馬湖建署於湖之東街以資彈壓於是始設屏山縣治發官銀四千三百四十兩買民地週圍一百三十六丈二尺建署於馬湖府署之東內縣丞衙門一座典史衙門一座陰陽學醫學申明亭官設知縣縣丞典史各一員六房司吏二人典吏二人陰陽官醫官各一員又以地方蕩平之初夷俗未化業儒者少議於黃螂雷波各建社學一所由本府考選德

性端謹曉暢文理社師二人免其雜差令彼到處訓教夷童俾其識字讀書候其風俗變化人文蔚起詳請建設屏山儒學以廣人才又設巡檢司於黃螂之懶坎坪又議更夷名更夷都鎮爲中都鎮沐川副長官夷姓者更爲夏用夏變夷自此始也又立通把守水池香樟一帶立張敬宗爲土把總給以冠帶就於水營內撥兵二百名與之防守又立降夷約它爲通事又修薛文清公書院又建立關王廟在府西四百里黃螂懶坎坪因兵備道擒安興時夢神授以方略次日遂獲安興建廟以彰其靈又建優恤戰士祠壇

設於蠻夷司週圍牆垣二十四丈以兵卒效死敵愾憤不顧身靈爽助虎狼之威英智奪犬羊之魄建祠以彰優卹設祭以勵忠勇善後之策無不用備

靖邊錄

崇禎末年張獻忠據蜀建武人宋堯引獻賊之黨來寇琪縣知縣徐慶餘力孤被執不屈死舉人袁向科

闔門被害

琪縣志

明季流賊至馬湖府府尹范學文集鄉兵與賊戰於

東門爲賊所敗眾遂散

舊通志雜志

獻賊黨孫可望入黔遣僞道商國是據敘州

宜賓志

附楊鴻基蜀難紀實思陵踐阼邊事日非大河南

敘州府志

卷四十二

紀事

五十一

北蝗旱頻仍饑民蠡起秦隴三川諸郡鞠爲盜區焚殺擄掠千百爲羣名號不一而李自成張獻忠其魁傑也丁丑獻賊竊入蜀疆殺總兵侯良柱由巴劍入而南竝罹其害此雖蜀難之始然不過所經遭其殺劫尙未攻城屠邑也於是於望星關半園關蒙壩關九園子諸隘增置將兵以防自秦趨蜀之岐路總名曰通邑五營至庚辰獻賊仍由丁丑盜入之途以擾川地究之五營雖設徒糜餉擾民於防禦未有毫髮益也自是諸賊橫行秦晉楚豫濠泗間夷陵寢賊宗藩在在荼毒而當事無策

雖朝廷屢命重臣推轂授鉞然不過收采虛聲壯猷罔據故動皆覆沒不返隻輪浸淫漫延不可撲遏至甲申三月自成犯闕神京淪沒矣是歲之夏獻忠自楚挽舟而上不過數萬人耳乃越下牢渡三峽古稱天險如蹈無人之境六月至重慶一鼓破城時瑞王自漢中爲賊所逼奔避渝城獻忠乃執王磔於教場時白日正中迅雷忽震獻賊反以砲向雷電擊之其無忌憚有如此者渝城夾在兩江之間惟西北佛圖關一路僅通車騎賊由是路攻城渝城之人如在釜中無所逃匿賊盡拘在城

男女老幼殺之其或不殺者則斷手剝刑縱令西上以張先聲時成平旣久沿途州縣見此輩狼狽之狀莫不魂喪胆裂避之恐後孰敢撻其鋒者獻忠駐渝殺戮逾月鼓行而西水陸竝進陸路由永榮資簡水路由中外二水八月至成都三日而城陷矣先是蜀王聞京城不守陰萌監國之謀巡按劉公之勃以正議格之蜀王遂恚時撫軍旣不守禦爲務而按臣則無餉無兵數請帑於王以資招募王方以不得監國爲憾堅不予餉故守備全無及賊破渝而西王方出鏹募人乘城人給白金

五十兩應募率皆游手無賴方授兵登陴各懷鋸超堞而去賊至無一人禦之故破一都會易於拉朽也城破劉公死之蜀王及世子投宮井死諸郡王官吏紳士軍民男女老幼竝遭殺戮慘毒有不忍聞者獻忠僭稱大西皇帝改年大順僞設部寺等官以成都爲西京然而賦性不移雖以爲開基立國而羣盜之習毫無悛改日以殺戮爲事聚徒數十萬惟以劫掠爲資所到之處無噍類焉劓刖截剝者其戲玩也蓋至是蜀難已成然遭屠戮者尙不過什二三耳乃西川人性戇愚特明順逆不

量勢力不肯被不義之名故其所置郡縣賊吏特以兵威迫脅民勉聽從兵纔他適則羣起而殺之而獻忠不自謂非帝王之器無綏靖之能反謂民刁俗悍難服易攜惟欲以殺戮爲威而勦洗之兵肆出矣且其賦性兇躁必時時屠剝當前然後快意故所遣賊將先誡其日錄所殺多寡以聞若一日之間所報但數十人則終日不怡必殺左右以洩其怒必報殺萬人或殺數萬人然後色喜愈多愈快如是者歲餘蜀人之存者什僅五六矣所殺雖多蜀民猶無別也於是下令郡縣勒令諸生赴

僞京考試撈求勾躡駟迫而行皆要諸途而殲之  
故蜀之得脫鋒刃者較齊民尤少耳乃民難未瘳  
天復助虐凡勦洗未及及巖穴竄匿之餘疫癘盛  
行十不活一甚有不數日而滅門者蓋至是蜀難  
彌殷民之存者什纔三四矣人不自存義兵四起  
什伯爲徒所在皆有雖於賊無所創艾然賊至則  
或逃或竄賊退則依然結聚自保賊反譏其無能  
爲也而名之曰土豹子蓋嘲其晝伏夜出竊噬雞  
豚祇足增嫌於人無大損也時宏光帝立南都起  
故輔巴縣王公應熊爲督師出瀘州起故甯夏巡

撫宜賓樊公一蘅爲總督出納谿皆委以恢復之  
任號召諸路官兵義旅響應雲合於是閩人曾英  
集眾數萬復重慶矣故弁王祥保綦江矣撫標叅  
將楊展出黎雅矣遊擊馬應試出敘南侯天錫屯  
海壩而新任川鎮賈登聯以及黔楚烏合之眾熊  
依顧仁壽譚得勝莫宗文張登貴魏民望熊小嘴  
輩或稱督師標或稱鎮標統號十副將者竝集川  
南矣而松潘副總兵朱化龍歛兵自守獻忠招之  
不從侵之不得方遣賊至汶威郡番操兵據險賊  
眾見其猙獰之狀氣躡心怖反甘言陷以賞邊委

數萬予之而還自是不敢西向賊威令所行不過近省州縣號令不千里矣獻忠自知不厭人望終無所成且久賊之無歸也思欲挾多金泛吳越易姓更名效陶朱之遊於是括府庫民兵之銀載盈百艘順流而東至彭山之江口初心忽變乃焚舟沉鏹而還自是無民可殺乃欲盡殺入川所招擄之新兵以適意以次及楚人次及他省之人而後及老本焉老本者秦人也其殺新兵也先給之曰某日發某處至其日羣賊露刃挾道林立者數十里所欲殺者從中魚貫而行以爲防其逃逸無他

虞也及至江河之所然後以次殺之而投水中前者流壅波赤而後人弗知也如是者數月新兵幾盡時丙戌八月矣乃盡焚宮殿官寺民居火月餘而行自此西川東南皆無賊蜀難其或已乎乃賈鎮及十副將輩聞賊北去相與倡言恢省牽率而西凡賊殺戮之餘恣其拷掠方至簡漢間不虞尙有餘賊回兵一擊大潰而奔不敢復西而惟盤踞於資內富隆瀘合之間日以打糧爲名四出搶掠其難更酷於賊蓋賊者所嗜者殺人子女之可取者取之其馬騾綾縠綺羅而外皆非所好雖金銀

重貲獻忠恐兵富而易逃也其令挾貲則殺之時  
時搽索故賊雖見金亦取之不耑求不若此輩無  
所不欲每得一人榜刺炮烙必得財物而後已但  
不輒殺之耳故民雖或免於兵刃而死於拷掠者  
十常八九也時蜀土不耕已二年餘糧罄竭民惟  
拾糶穀採野菽以充腹已有人相食者而諸君搽  
劫無已民不能出而求食故不死於兵則死於饑  
蜀難至斯轉劇民存十不能一矣初獻忠之棄成  
都而北也本欲歸秦不知 清師已定關隴至川  
北而進退無所回翔莫適猶日以殺兵爲事欲殺

之務盡俾他日逃遁無人識認也至冬遣其僞驍  
騎都督劉進忠先驅出秦進忠見其肆殺部人懼  
禍及己因赴肅王投誠反爲鄉道至順慶而及之  
獻忠方結壘鳳凰山偵者報秦兵至以爲駭眾立  
殺之如是者三及大兵壓壘獻忠始出帳覘望則  
一矢貫咽而殪矣賊將孫可望等收合餘眾尙數  
萬人奔渝曾英不思致死之寇當姑縱之而設伏  
尾擊之可數日而盡也乃列兵江上以遏其鋒一  
戰而敗英墜江而死賊眾遂田遵而黔而滇焉獻  
忠死而其眾奔肅王亦不追躡惟帥師自西而南

賈鎮輩聞風逃遁丁亥二月肅王至遵義賈登聯  
譚得勝詣降給以晏犒軍殲焉王祥哀集曾英餘  
眾亦數萬人由川南綏陽而復遵義遵人迎戰失  
利且以北人不宜南土人病畜亡遂斂兵而還蜀  
土千里坵墟芻糧莫給徑返川北保甯從此歸版  
圖矣時蜀疆無寇向之仗言恢復者皆出而據土  
自雄於是楊展據嘉定省東州縣上下川南皆其  
屬惟永瀘不與焉王祥據遵義以津合彭黔爲邊  
境而時擾於境外侯天錫據永甯馬應試據瀘衛  
而時往來於瀘富之間曾英部將余大海李占春

據涪州之平西壩上而長墊下止酆都以北則以  
近 清而不敢問其忠萬則爲忠州世弁譚文譚  
宏及譚詣號三譚者所有其他聚一鄉保一砦或  
孤立自守或遙附於他人者固難更僕數也使其  
各保境安民積糧養士以待時清則蜀難從此亦  
止可矣無如此曹貪亂樂禍不肯少悛日尋干戈  
忽相吞噬當此千里無煙之日子遺落落值其蹂  
躪者顛天罔應入地無門人生至此生趣盡矣奈  
之何亂兵之禍未終姚黃之難復及耶姚黃者本  
流賊別部亦起於延慶諸郡有埽地王奪食王滿

天星飛行十里小紅娘諸名最爲猥瑣其眾亦不  
如自成獻忠之強而崑已橫行不相附麗其行徑  
與獻忠小異而大同者以殺人爲尋常所獨者以  
索財爲痼癖自獻賊方熾之日已入蜀疆特以勢  
力相懸不敢向邇惟萍蕩於巴閬重夔諸郡邊秦  
之兵殺劫爲資及眾兵已駐保甯復不向北漸流  
而東至是民盡食窮摻括無所乃由梁墊涪彭南  
綦諸郡邑自東而南己丑之春遂至敘瀘之邑於  
時地不耕已五年民之僅存者百一戊子之冬亂  
兵之害方稀殘民遠求豆麥刀耕火種以爲自是

或可少延乃豆麥甫實未成而姚黃猝至夫以長  
林豐草鹿豕縱橫寥寥子遺何難伏匿不知姚黃  
掩捕摻索之功不特獻賊之所不能卽向之亂兵  
亦有所不逮蓋此日之姚黃已無不饒於財者矣  
獲人而拷掠所急在於得糧糧不得則殺之以充  
食民之僅存於百一者至是又死過半矣至是蜀  
難已極無可復加民之存者百不一人若能完其  
家室者千萬中不一見也鷄豚絕種已數年斗米  
數十金耕牛一頭售銀三百兩皆遵黔重利輕生  
之輩遠販而至加以數年斷絕人煙虎豹生殖轉

盛書夜羣遊城郭村墟之內不見一人驅逐之其胆益張遇人卽撻甚至突牆排戶人不能禦焉殘黎之多死於虎又一難矣人生至此甯復望再覩天日耶迨至孫可望自滇據黔辛卯遣人偪遵王祥兵潰自剄於是有遵義劉文秀自建南出黎雅楊景星奔投保甯下兵犍爲擒袁韜而降武大定再合遵渝之兵東下余大海李占春放舟而奔楚他如三譚天錫之輩或降或遁自此三川之阻兵者皆盡雖殺運猶未盡民難猶未弭而回視向之日月豺虎霜雪衣裘傾耳戴目東竄西奔以賒須

與之死者已不啻水火衽席之不侔矣迨己亥庚子歸於一統蜀民始有生全之樂焉卽今休養五六年而元氣未復誠古今之所罕見余本蜀人生逢其世幸賴先人之蔭孩提從先君遊宦迨復故鄉間視故壘遺垣白骨如霜彌漫蔽草故老指之曰此某賊某君之所屠也頽垣斷壁之間血痕猶赭曰此某賊某兵所汙染爲遊戲者也城郭村墟惟餘瓦礫曰此某賊某兵之所焚毀者也甚而破釜敗缶之中髑髏猶在曰此姚黃或饑民所食之棄餘也至今思之猶爲心悸故詳憶見聞傳之筆

北事皆考實言非無稽將來有事蜀乘之君子或  
見斯編不以人廢得荷兼收非欲補掌故之遺或  
可證傳聞之誤云爾